



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**

**Tribunál Distritál Oe-Cusse**

**29 Janeiro 2018**

**Tribunál Distritál Oe-Cusse primeira-vez aplika regra ba konduta ba kondenadu iha krime violénsia doméstika**

**JSMP: kongratula mudansa importante ida-ne'e no rekomenda atu kontinua aplika regra ba konduta barak liu iha kazu violénsia doméstika sira seluk iha futuro**

Iha 22 Janeiro 2018, Tribunál Distritál Oe-Cusse kondena arguidu ba kazu ofensa ba integridade fizika simples ho natureza violénsia doméstika ho pena prizaun tinan 2 maibé suspende ba tinan 2 no selu kustu judisiál US\$ 30.

Tribunál mós aplika regra ba konduta atu arguidu apresenta-an periodikamente iha Tribunál fulan 1 dala 1, iha loran primeiru iha kada semana primeiru, durante tinan 2 nia laran (durante períodu suspensaun nia laran).

Tribunál konklui katak arguidu provadu komete krime ofensa ba integridade fízika simples hasoru nia feen iha 25 Jullu 2017, iha Distritu Oe-Cusse.

“JSMP kongratula no apresia mudansa pozitivu iha Tribunál Distritál Oe-Cusse tanba hahu utiliza provizaun sira kona-ba regra ba konduta iha Kódigu Penál iha sira nia desizaun, liu-liu ba krime ho natureza violénsia doméstika hanesan saida mak durante ne'e JSMP rekomenda ba tribunál sira”, dehan Diretor Ezekutivu JSMP, Luis de Oliveira Sampaio.

“Ne'e mudansa ida pozitivu teb-tebes, partikularmente iha Tribunál Distritál Oe-Cusse ne'ebé antes ne'e nunka utiliza no aplika regra ba konduta ka dever adisionál iha kazu violénsia doméstika”, nia hatutan.

JSMP haksolok tanba hare mudansa pozitivu ne'e akontese iha Tribunál Distritál Oe-Cusse, deposede fulan ida JSMP lansa nia relatóriu temátika kona-ba “Sentensa no Violénsia Doméstika: Suspensaun ba pena prizaun ho kondisaun sira<sup>1</sup>” ne'ebé publika iha 20 Dezembru 2017.

---

<sup>1</sup> Relatóriu ne'e disponivel iha : <http://jsmp.tl/wp-content/uploads/2012/05/17.12.17-FINAL-Report-on-suspended-sentences-with-conditions-TETUM.pdf>

Rua Beco Lakateu, Aldeia Manu fuik, Suku Colmera, Administrativu Vera Cruz

Dili Timor Leste

PoBox: 275 Telephone: 3323883 | 77295795

[www.jsmp.tl](http://www.jsmp.tl) [info@jsmp.tl](mailto:info@jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl

Relatóriu ne'e deskuti kona-ba tendénsia aplikasaun sentensa iha kazu violénsia doméstika iha Tribunál sira no preokupasaun sira JSMP nian relasiona sentensa hirak ne'e. Partikularmente JSMP subliña preokupasaun sira kona-ba regra ba konduta no dever adisionál sira iha artigu 69 no 70 Kódigu Penál ne'ebé ladun utiliza másimu iha desizaun judisiál sira.

Antes ne'e, tuir monitorizasaun JSMP nian hatudu katak Tribunál Distritál Oe-Cusse no Suai nunka aplika regra ba konduta ka dever adisionál iha kualkér kazu krime sira iha jerál, partikularmente iha kazu violénsia doméstika sira.

JSMP fiar katak sentensa ne'ebé inklui regra ba konduta ka ho orden adisionál sei asegura arguidu sira atu kumpri desizaun tribunál ne'ebé aplika ba arguidu sira. Regra ba konduta no dever adisionál nu'udar meu prátiku ne'ebé fasil liu atu kontrola kondenadu sira no sei prevene arguidu/kondenadu sira atu repete sira nia hahalok iha futuru, liu-liu iha kazu sira ho natureza violénsia doméstika ne'ebé husi lora ba lora sempre akontese iha comunidade.

Iha relatóriu temátiku ne'ebé publika iha Novembru tinan 2015 ho titulu "Aplikasaun Sentensa Alternativa iha Kazu Violénsia Doméstika iha Tribunál Distritál Oe-Cusse<sup>2</sup> no relatóriu "Sentensa no Violénsia Doméstika: Suspensaun ba pena prizaun ho kondisaun sira", rekomenda importansia no nesesidade atu aplika regra ba konduta no/ka dever adisionál hamutuk ho suspensaun hosi pena prizaun ba kazu violénsia doméstika sira tuir rekizitu sira iha Kódigu Penál.

JSMP rekomenda ba Tribunál Distritál Oe-Cusse atu mantein prátika diak ne'e no kontinua aplika regra ba konduta ka dever adisionál barak liu iha kazu violénsia doméstika sira seluk iha futuru atu asegura katak kondenadu sira kumpri desizaun tribunál sira.

JSMP mós kontinua rekomenda ba Tribunál sira atu konsidera hodi dezenvolve matadalan ba sentensa iha kazu violénsia doméstika atu ajuda Tribunál sira identifika pena no medidas protesasaun sira ne'ebé apropiadu tuir prinsípiu no rekerimentu sira iha Kódigu Penál no Lei Kontra Violénsia Doméstika (LKVD).

Kazu ne'e rejista iha Tribunál ho Nú. Prosesu : 0146/17.OESIC. Julgamentu ne'e prezide husi juis singulár, Dr. João Ribeiro. Prokuradór representa husi Dr. Mateus Nesi no arguidu hetan defeza husi Dr. Calisto Tout hosi Eskritóriu Defensória Públiku.

Atu hetan informasaun liutan bele kontaktu ba:

Luis de Oliveira Sampaio

Diretór Ezekutivu JSMP

E-mail: [luis@jsmp.tl](mailto:luis@jsmp.tl)

---

<sup>2</sup> Relatóriu ne'e disponivel no bele asesu iha: [http://jsmp.tl/wp-content/uploads/2012/05/FINAL\\_JSMP\\_Sentensa-alternativa\\_TDO\\_Nov-20151.pdf](http://jsmp.tl/wp-content/uploads/2012/05/FINAL_JSMP_Sentensa-alternativa_TDO_Nov-20151.pdf)